

Regional News Unit AIR Aizawl
Friday, June 20, 2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Ni 2 awh Indian Roads Congress Mid Term Council Meeting vawi 233 chu Mizorama, Mizoram University Auditorium-ah neih a ni ang.
- Cooperation Department changtu Minister Pu PC Vanlalruata chuan tung leh sapthei chin lamah hmalak chho mek a nih thu a sawi.
- Power & Electricity Department chu enkawlna felfai zawk leh chak zawka mipui tana hna a thawh theih na'n corporation atana dah turin chak taka hmalak mek a ni.
- India sawrkar chuan Israel atanga India mi te hruaichhuah a rel.

<><><>

INDIAN ROADS CONGRESS PRESS CONF

Ni 2 awh Indian Roads Congress Mid Term Council Meeting vawi 233 chu Mizorama, Mizoram University Auditorium-ah neih a ni dawn.

Indian Roads Congress (IRC) President Prof. Manorajan Parida chuan Mizoram PWD in an sawm angin ram chhunga kawngpui siam dan tur tehfung pawimawh hrang hrang duangtu Indian Roads Congress hruaitute an kalkhawm a ni a, nizana Hotel Regency, Aizawla chanchinbumite an kawmnaah IRC President chuan IRC chu highway engineer leh professional hrang hrangte intelkhawm pawl a nih thu leh an pawl chuan kawngpui siam, lei dawh leh kawngpui hmanga inkalpawh chungchanga dan leh tehfung zawm tur hrang hrang - Indian Standards, Code, Manual leh adangte an duan thin thu a sawi a ni. Vawiina an hman tur mid term council meeting mai bakah, annual session, international seminar leh workshop hrang hrangte an buatsaih thin thu a sawi a. Tun tuma Mizoramin a thlen tur an Mid Term Council Meeting-ah pawh IRC Publication thar 5 tlangzarh a nih dawn thu a sawi a ni.

IRC President chuan an Mid Term Council Meeting chu Chief Minister Pu Lalduhoma'n a hawn dawn thu leh Union Minister of State (Ministry of Road, Transport & Highways) Pu Harsh Malhotra bakah mi pawimawh hrang hrang an lo tel dawn a ti a. Meeting chu thuang thuma then a ni anga, he meeting-ah hian IRC Council Member mai bakah State tin PWD Principal Secretary leh Secretary te, PWD hotute, MoRTH, NHAI, NHIDCL leh hmundang atanga mi pawimawh tak tak an fuankhawm dawn thu a sawi a. Mi 95 vel tel tura an beisei thu leh nizan thleng khan mi 50 velin Aizawl an thleng tawh a ti.

Byte of Prof. Manorajan Parida

IRC hruaituten chanchinbumite an kawmnaah hian Ministry of Road Transport & Highways Special Secretary leh DG (RD) ni bawk Pu V. Rajawat, Mizoram PWD Engineer-in-Chief Pu H. Zoramliana leh IRC Secretary General Pu Rahul Gupta bakah mi pawimawh dangte an tel a ni.

<><><>

IDY

Mizoram University Yoga Centre Co-ordinator Prof. Sanjay Kumar chuan Mizoram University huamchhunga zirlai leh zirtirtu tam takin nitin Yoga hmanga an insawizawi thin thu a sawi a. Nun hrisel zawk neih nan tangkai takin Yoga chu an hmang thin a ni a ti.

Akashvaniin a kawmnaah Prof. Sanjay Kumar chuan he thu hi sawiin International Day of Yoga pualin hun hrang hrang buatsaih a nih thu a sawi a. Tun thla ni 7 atang khan Yoga Training cum Workshop Programme (Shivir) in Common Yoga Protocol chu International Day of Yoga pualin Inrinni thleng awh turin Yoga Centre, Mizoram University-ah buatsaih a nih thu a sawi a. Nimin khan International Day of Yoga pualin Elocution Competition buatsaih a ni a thupuih zirlaite nuna Yoga pawimawhna ‘Importance of Yoga in Student’s Life’ tih hman a ni a ti.

Prof. Sanjay Kumar chuan tun thla ni 21, International Day of Yoga vawi 11-na chu Mizoram University Multipurpose Hall-ah zing dar 6 leh minute 15 atangin hun an hman tan dawn thu a sawi a, Mizoram University zirlai bakah zirtirtute an tel dawn thu a sawi a ni.

<><><>

IDY

International Day of Yoya vawi 11na pual in Ministry of Culture chuan june ni 21 hian a lawmna hun a buatsaih dawn a, he hun ah hian khualzin te tlawh theih hmun nuam tak tak hmun 100 ah siam anih dawn bakah ram chhung a cheng te hnamzia phochhuahna hmun 50 ah siam ani dawn bawk. He hun ah hian Prime Minister Narendra Modi pawh in a telpui dawn a ni.

Culture and Tourism Minister Gajendra Singh Shekhawat chuan Rajasthan khawpui a Yoga programme a hmanpui dawn a ni.

<><><>

COOPERATION MINISTER

Cooperation Department changtu Minister Pu PC Vanlalruata chuan tung leh sapthei chin lamah hmalak chho mek a nih thu a sawi.

Nimina Dawrpui Multipurpose Centre, Aizawla Mizoram State Cooperative Union General Assembly Vawi 36-na a hmanpuinaah he thu hi sawiin Minister chuan tung leh sapthei chu tunhnaiah hralhna a that thu sawiin ching turin loneitute an hrilh thu leh tunah hian hma lak chhoh mek a nih thu a sawi a.

Tung leh saptheia hma la thar mek chu intelkhawma society anga ding tura a duhsak thu leh an intelkhawm chuan an chak dawn thu a sawi a. An intelkhawm chuan thiltih a awlsam dawn thu leh khawl mamawh thut a awm pawha society anga lei chu a awlsam zawk thu a sawi a ni.

Byte of Minister

Minister chuan Mizorama Cooperative Society ten an mamawh ber chu tanrual a nia a hriat thu a sawi a. Tanrual chuan chak zawkin hmalam a pan theih thu a sawi a. Cooperative movement lamah thangthar lehkhathiam zawk te a tam thei ang ber an tel a tul tawh thu a sawi a, kum upa lam ten sulhnu tha tak tak nei mahse chak taka cooperative movement a than zel theih nan thangthar te hnuhluh a ngai tih a sawi a ni.

Mizoram State Cooperative Union hi kum 1975-a din niin kumin hi a kum 50 na, Golden Jubilee kum a ni a. Hetihruual hian harsatna avangin Annual General Assembly chu neih theih loh kum a awm zeuh zeuh avangin vawiin assembly hi a tun 36 na a ni thung a. An hnuaiah hian kum 2024 atanga kum 2025 chhungin Annual fee pe, society 211 an awm a. State level Cooperative Society 9 leh District level Cooperative Society 1 an awm bawk a ni.

<><><>

MUHCS

Mizoram Universal HealthCare Scheme (MUHCS) kalpui mekah Sorkar chuan mipuite hmakhua ngaiin Private Hospital te nen inrawn tlanga, dawhkan khat kilho a inbiakremna kawng zawn zel chu a duh dan a ni, a ti.

Private Hospital intelkhawm pawl – Non Government Hospital Association thuchhuah chhanglet in Mizoram State Health Care Society chuan he thu hi a sawi a, an thuchhuahah chuan Private Hospital intelkhawm pawlte hian Cashless avangin nitin sum lut awm lo tura an ngai chu a diklo a ni an ti a, Sawrkar lam chuan Cheng Nuaih 50 advance a pek a inhuam bakah kar tinin damdawiin bill hi pek thin a ni a, an buai lo turah a ngai a ni a ni.

MUHCS rate hi zaa 50-80 vela hniam zawk anga sawi chu hriatchian loh vang niin a lang an ti a, Phai lam Hospital leh Mizoram Private hospitalte chu Rate chungchangah te, Quality chungchangah te, Grading chungchangah te khaikhin chi a ni lo tih sawiin, heti chung hian Sorkar chuan, Mizoram Private Hospital-te chu duattakin Phai lam hospital te nen rate inang tlang a a siamsak bakah, hemi piah lamah pawh hian sawipui a la inhuam cheu a ni a ti.

Phai lam Non-empanelled Hospital te, reimbursement phalsak anga sawi chu a dik ziktluak lo bawk ni a sawiin, MUCHS guidelines emergency-ah emaw Empanelled Hospital ten an enkawl theihloh natna bikah chuan Phai emaw Mizoram chhung pawh ni se Non-empanelled Hospital-ah chuan reimbursement theih reng a ni, an ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



POWER

Power & Electricity Department chu enkawlna felfai zawk leh chak zawka mipui tana hna a thawh theih na'n corporation atana dah turin chak taka hmalak mek a ni.

Ningani kal ta a Power & Electricity Minister Pu F. Rodinglana hova department thuneitute thukhawm chuan P&E Department hmasawn na'n department ni lova sorkar hnuai a corporation a let turin chak taka hmalak an rel a. Minister chuan inrelbawlna tha zawk a awm theih na'na corporation-a dah chu ZPM sawrkar thiltum zinga mi a nih thu sawiin mipui leh sawrkar tan kalphung tha zawk a thlen dawn a ti a, hemi kawngah hian chak taka hma la turin department hotute a chah a ni. Hemi chungchanga hmalakna kal zelah hian ruahman ang chuan Generation, Transmission leh Distribution ah te then hran tur a ni a, heng Strategic Business Unit (SBU) hrang hrangte hian anmahni chanpual theuh an enkawl dawn a, hemi mil hian department sawi danglam pawh kalpui tura rel a ni a, a theih anga midang kuta hlan leh midang enkawl tura pek tura hmalakna pawh kalpui tum a ni ang.

An inrawnkhawmna a an tarlan danin he ruahmanna hi sawrkar laipui duhdan leh Electricity Act 2003 in a sawi anga siam niin hetiang hnathawh tur bik chang tura in siam thar a nih chuan SBU hrang hrang te hi anmahni hna theuhah an in sawrbing thei dawn a, inrelbawlna tha zawk nei tura ruahman niin kawlpheha sem chhuah bothlau pawh tlahniam tura beisei a ni.

Nikum March thlaa Assembly thutkhawmah P&E Minister Pu F. Rodinglana chuan a department enkawl chu corporate lam an hawi tan thu sawiin tuna in se zawl chhuah ngawt theih a nih loh thu a sawi a. An hmalakna kawng tinrengah intodelh phawt turin ruahmanna an siam thu leh, an hmalakna kawng tinreng chu corporate lam hawi a nih thu a sawi a ni.



EVACUATION

India sawrkar chuan Israel atanga India mi leh sa te hruaichhuah a rel a, Iran leh Israel inkar buaina chhuak mek avanga boruak chhe zel tur ngaihtuah in Iran atangin ram mite hruaichhuahna Operation Sindhu chu a kalpui mek a ni.

Ministry of External Affairs chuan India mi Israel chhuahsan duhte ramri kan a kalpui a nih tur thu a sawi a, chumi hnu ah thlawhna hmangin India an pan dawn a ni.

Sawrkar chuan Israel ram a India khua leh tui zawng zawng te chu fimkhur tur a chah in, ram pawn a mite him na chu a ngaih pawimawh thu a sawi a, Iran atanga India mi zirlai 110 te chuan New Delhi an thleng tawh a, Ministry of State External Affairs Kirti Vardhan Singh chuan Iran a India mi insawnehhuak duh 350 chuang in ngenna an thlen tawh thu a sawi bawh. Nimin khan thlawhtheihna 1 chuan Turkmenistan a India mite hruai turin a kal mek thu a sawi bawh.

